



UAE anjur Pemantapan Program Profesional bersama 15 rakan strategik

UMP Advanced Education (UAE) mengadakan satu program khusus bagi menerangkan proses kerja program profesional yang melibatkan 15 rakan kerjasama strategik UMP bertempat di Hotel Vistana Kuala Lumpur pada 13 November 2015 yang lalu.

Ketua Pegawai Eksekutif UAE, Mohamad Rozi Hassan berkata, program bertujuan memberi penjelasan tentang proses permohonan program, pengeluaran surat tawaran dan pembiayaan program.

“Program juga membincangkan kerangka kelayakan akademik, peraturan akademik dan jaminan kualiti program Pembelajaran Sepanjang Hayat (PSH) selain memberi penjelasan tentang kualiti akademik.

“Taklimat ini juga sebagai usaha dalam memastikan tahap kualiti akademik program yang ditawarkan oleh rakan kerjasama strategik menepati *standard* yang ditetapkan di samping menyelaraskan proses kerja rakan kerjasama agar menepati kehendak dan keperluan organisasi.

Tambah beliau, pihak UAE sentiasa komited dalam memastikan segala proses kerja yang dilakukan diikuti dan sentiasa difahami oleh rakan kerjasama demi memastikan tahap kualiti pengajian sepanjang

hayat mendapat tempat dalam kalangan golongan yang bekerja khususnya di sektor industri tertentu untuk menyambung pengajian.

Menurutnya, taklimat kepada rakan kerjasama berkaitan program PSH ini akan dijalankan dari semasa ke semasa bagi memperkemas lagi proses kerja yang dilakukan antara UAE dan rakan kerjasama strategik yang lain.

Beliau mengharapkan program ini dapat memperluas akses pendidikan kepada umum dan meningkatkan kualiti program PSH dalam memenuhi Lonjakan 3: Menghayati Pembelajaran Sepanjang Hayat seperti yang terkandung dalam Pelan Pembangunan Pendidikan Malaysia 2015-2025 (Pendidikan Tinggi).

Hadir sama menyampaikan taklimat Pengurus Besar (Akademik) UAE, Dr Haji Mohd Rashid Ab Hamid dan Penasihat Akademik UAE, Profesor Dr. Abdullah Ibrahim.

